

CARNAVALSMENU

De Oetsjmieter (of sjtrammer Max)

Eederein haet missjien al ins gehuurd euver de Big Mac index. Zoe kinste aan de de pries van de Big Mac zeen hoe t geit met de inflatie of economie. In Bemele höbbe veer gein Big Mac's mer es geer toch wilt kieke hoe 't geit met de inflatie kint geer messjien kieke nao de pries van de Oetsjmieter....

Nog beter, es geer de inflatie te sjlum aaf wèlt zeen dan maak geer met carnaval de oetsjmieter zellef, appeltje eitje,... euhhh mer dan zoonder appel.

In Duitsjland neume ze dit unne Strammer Max (veur degene die gein voldoende houwe veur Duitsj vreuger op sjoel: Strammer Max beteikend eigenlijk "een erectie") waarsjijnlijk vanwege de drei eier mer veer geve gein garanties.

Men neme:

-3 eikes (pfas vrij netuurlik)

- twee lappe Sjink

- twee lepkes kies

- twee sneije lekker doonker broed

- eventueel : sjpek, tomaten, unne

- en veur de sier en um 't get deurder oet te laote zeen: get greunvoor rontenum (die miestal toch bleif ligke...)

Legk twee sneije broed op un bord (veur de vroului zoonder boter, want die lijnen altied). En essebleef, legk die boterhammen gewoon néve elkaar en neet op elkaar...

Belegk 't broed met de sjeenk en de kies (maogste ouch werm make) en eventueel de tomatte en unne.

Bak in de pan dreij (!!!) eijer en legk die op de boterhammen. Drapeer de sjpek d'r euver heen en doe ch tensjlotte get greunvoor debée. En klaor is Kees (of Max)

En maak ze 'm zelf höbste nog genog euver veur 3 glaze beer.



De kopere Kromme



De koperen kromme, geit dit jaor nao al diegene die de keender-carnaval in Bemelen zoe geweldig höbbe opgepak !!

Zee zurreege d'r veur dat ouch veur os jeug d'r unne geweldige carnaval is, chapeau !!

Ludiek is ouch de menier boe op zee de statiegeld actie höbbe opgezat, De raad van elf en veural Preens Luc haet zich de groetste meujte gedoon um al die flesje laeg te make oonder t motto Dreenk Beer veur keender-plezeer..



Onderstaande bedrijven steunen de Carnaval in Bemelen, steunt u hen ook?

Dreessen bouwkundig advies BV - Tom van Leeuwen - Cafe 't Plateau - Gastrobar "Die Twie" - Hotel Bergrust - P. Heijns Installaties - Camping Vinkenhof - H&R Andriën Loonbedrijf - Nijskens Grondwerkzaamheden - Thomassen Plantprotection BV - Hanos Valkenburg - Electro Duijkers - van Gregor - Bér Huynen Land & Tuinmachines - Cafe Zuid - Crijns Bandenservice BV - Kapsalon Alere Hair - Up-stage - Dierenkliniek Maastricht - Paul Bovens architectural design - Gezondheidscentrum Bemelen t.a.v Corine Politsch - De Bonte Haan - Mourmans Infra Support - Bistro Papillon - B&B st. antoniusbank

De Gekkegazel

Carnavalsgazet van CV de Berggeitte 2026



Es alles good geit, dan zeet geer veur uch ligke de letste gekkegazel die veer make.... 't is gewoon neet mie te doen, 'n jaor veurbereiding, talloze vergaderingen met allein mèr sjaele kal dae toch neet in 't beukske kump (of maog), hoonderde foto's van allein ,mer zaate (of naatsje of allebei) luij die d'r allemaal neet knapper op weure... Preense boe ste wekelang mos vraoge um e sjtukske te schrieve... En dat ouch nog ns allemaal gratis, zoonder e dankjewel, unne medaille of, nog erger, zoonder e rundsje... De oplossing veur dit alles? AI (veur de lezers die neet weite wat AI is, of zelf get wienig I höbbe: AI is un programma wat alles veur diech deid,... Teikene, sjrieve.... Neum mer op. Umdat 't programma **ChatGTP** nog neet zoegood waeg wèt met 't Limburgs höbbe veer 'n aantal concurente bekeke zoe es:

ChatGPP, kin hiel good um goon met dialect, mer jaomer genog kump d'r allein mer gewouwel oet, wie later op de aovend wie erger. Zeker nao 'n aantal glaze beer.... onbegriepelik... d'r is hei ierder sjprake van IA IA, dan van AI **ChatFCB**, gespecialiseerd in sportversjlage, wèt van niks hiel get te make mer produceerd bladzijdes vol tekst boe de neet liefhebber hauerwege aafhaok.

ChatSGP, eigenlijk allein gesjik veur kerrekberichte in d'r Tump. Veur 't carnavaklgezetsje te braaf en mier SA-AI dan AI

ChatGvd, hielemaol neet gesjik veur kerrekberichte mer mier veur es te diech op diene doum höbs gehouwe of eine d;n beer um sjtoet.

ChatPVV, hei bleek dat d'r hielemaol geen sjprake is van intelligentie. Haet hiel veul meuite andere talen.

ChattePie, kin waal dialect mèr allein Mestreechs, trek alles te laank en is erg chauvinistisch, afgeloupe jaore deks te huure bee DieTwie, mer die höbbe inmiddels unne upgrade gehad.

Op dit moment zeen veer d'r nog neet hieleaol oet.

Daorum zulle veer dit jaor nog zellef de kwatsj motte bedeenke. Toch zeen veer neet de einige in Bemele die aan 't kieke zeen veur 'n AI oplossing. Zoe lieke de berichte doot 't besjtuur van 't gemeenschapshoes al jaore door ChatGPT te zeen gesjreve.

Mer neet allein tekst is door AI tegewoordig te make, ouch bijnao echte foto's kint geer met AI producere, Zoe kin de carnavalsvereiging fleenk besjpare op koste.

Foto's van 't jubileumfees, gein probleem geine fotograaf nudig, gewoon un half oor achter de computer en de höbs de sjoenste foto's boe op ze 't zoe druk maaks es te wèls. Un prachtig monument ter iere van 't 55 jaorig besjtoon? Geine kunstenaer nudig, gein koste, gewoon ff 'n foto producere, zuut geine mins, en ze kinne zich de koste en meijte besjpare...

Veer höbbe zelfs gehuurd dat de berggeitte volgend jaor hielemaol virtueel wèlle goon met de ierste virtuele preens, Preens Arl d'n ierste Ai-laaf Ai-laaf



Foto De Limburger: Preens Luc onthult 't sjtandbeeld van de jubilerende berggeitte tijdens de optocht in Bemele.



Wls geer dat...?

Netuurlik haet de redactie ouch dit jaor weer heur oer te luustere gelag in Bemele um uch de letste roddels te kinne vertelle. D’r is netuurlik neet zoeveul gebeurd dit jaor mer toch.... En es ’t neet woer is, dan hōb geer ’t neet van os...

Wls geer dat...?

- Net noe veer un jaor gein biezunder watereuverlas hōbbe gehad de Heemkunde vereining us lestig geit valle met hunne kalender euver water,
- dat dat volges os ouch vèlt oonder watereuverlas...
- Dat die nog twie jao veuroet kinne es ze ’t Gaas en ’t Leech nouch nog doen mèr dat zee ’t dan ouch neet mie weite...

- Veer hun advisere um unne kier unne kalender te doen met allein mer ouw kloete...

- De heemkunde noe al op zeuk is nao mansluij van Bemelen van 60 en ouwer veur de benudigde dickpics....

Wls geer dat...?

- Ouch in Bemele de ierste drone is gesignaleerd?

- Kerrekbezoekers oonder de mis un raar gebrom huurden en dat neet van de veurzanger kaom?

- en dat ’t ouch neet de heilige geest waor dae nederdaalde mer unne drone?

- achteraaft bleek dat dae besjtuurt waort door Marleen die dao met wilde inspectere of d’r good gepotst waor?

- en tegeliekertied wilde kieke of d’r neet sjtielkem toch luij op ’t oksaal waore gekrope?

- dat menier Pesjtoer noe ouch gebruik wil goon make van de drone um vanaaf ’t altaar de communie te bezurrege en de zege te geven?

- dat veer dan ech kinne zegke dat de zege van bove kump?

Wls geer dat...?

- Met de drone unne ganse film gemaak is euver de kerrek?

- Zoedat, es de kerrek tou is, toeriste tóch de kerrek kinne bekieke via ’t filmke op Internet?

- Flup van dieTwie ouch al aangegeve haet interesse te hōbbe in zoe ’n filmke zoedat de toeriste in ever geval kinnen kieke wie ’t er in de café oetzuut es dae tou is?

Wls geer dat...?

- d’r ouch unne film is gemaak van de processie in Bemele?

- dat dae waarsjijnlijk ouch op TV keump bee “Processie gemis? “ (en geer dae dao sjnel kint doorsjeule?

- De heemkunde stichting ouch de euversjtap wil make van beuk nao film umdat de jeug toch neet mie kin leze?

- de ierste TikTOK filmkes volgend jaor verwacht weure

Wls geer dat...?

- De Carnavalsvereiniging hun jubileumjaor hōbbe gevierd in ’t gemeinsjapshoes met “Bemele in Rossi”?

- veer houpe dat de vereniging noe zelf ouch neet “in het Rossi” terecht is gekomme?

- ’t anders volgend jaor neet de heren van Aemstel mèr “de dames van Gulpe” of zelfs de Boere van Bemele weure?

Wls geer dat...?

- Wiel Pittie unne nuije oto haet?

- Dat dae zoe klein en sjmaal is dat heer eindelijk via de achterdeur tot aan ’t buffet bee DieTwie kin reje?

- Dat Bemele zoe de ierste drive-in café van Limburg haet gekrege?

- dat veer in Bemele noe un echt openbaar oplaadpunt hōbbe veur electrische oto’s?

- Dat Flup van DieTwie ouch heij van haet aangegeve interesse te hōbbe veur bee de café (sorry Gastobar)?

- dat met un oplaadpunt luij die doorsj hōbbe op eeder moment van d’n daag zich kinne komme oplaaje aan un Beer-oplaadpunt?

Wls geer dat...?

- allebei de waterputten in ’t durp binnen eine maond zeen opgeknep en d’r weer sjoen oet zeen?

- veer neet sjnappe dat ’t met ’t gemeinsjapshoes dan zoe lang mot doore want dat is noch altied un bouwput.

- Of zou ’t dan toch ouch un (bodemloze) put zeen?

Wls geer dat...?

- d’r ouch in 2025 weer geine buure daag is geweis mèr waal unne boerekermis?

- zoe zuuste mer este niks met hoofs te numme en de vreet oet krijgs dan komme ze waal....

- ’t sjpreekwoord noe geit van “Beter ’n verre boer dan een naaste buur”

Wls geer dat...?

- ’t Antoniuskoer veur de keersj dit jaor met de bus nao Banneux is gegange um te zinge?

- dit oonder de titel “Antoniuskoer on tour”

- zee met de bus goon en andere motte goon loupe.

- in Banneux gebeure dus nog wonderlikke dinge, d’n eine kint weer loupe de andere kin straks houpelik zinge.....

Wie ’t oets begos



GEIT ’T? JAO, ’T GEIT....

Gewoen ’n vraag: geit ’t nog ’n bitsje? Gewoen ’n antwoord: jao, ’t geit! Want ’t geit nog altied in’t riek van de Berggeitte. ’t Geit zelfs al 55 jaor. Tied um ins trugk te kieke. Want veurdat ’t geit, moot ’t auch oets begos zeen. De verleije tied van goon is ummers ging. Wie ging ’t mèt de geit veurdat ze wiste dat ’t zoe lang door zou goon?

Um mèt ’t begin te beginne: tot 1970 waor d’r nog geine georganiseerde vastelaovend in Bieëmele. D’r woord waal gevierd, mèr dat gebäörde sjpontaan, op kleine sjaal, in de kaffee of zoe, en andersj trokke ze nao de bure in Keer of Hier of Mestreech. Mèr dat zouw gauw verandere. In 1970 kreeg Bieëmele mèt Hennie I (Koekelkoren) ziene ierste jeugdprins, en ’n jaor later auch ziene ierste groete prins: Pierre I (Thomassen). De ierste van wat eine lange serie zouw weure, mèr dat wis toen nog geine...

Typisch veur Bieëmele: de prins waor d’r ieërder es de vastelaovesvereniging. Dat ging zoe: Pierre waor destieds in militaire deens, en ziene commandant – duudelik geine Limburger – haw veur de carnavalsweek ’n oefening op touw gezat. Dao haw Pierre hielemaol geine zin in, dae wilde carnaval viere. Mèr de commandant haw de Brabènders en Limburgers vanteveure gewaarsjoud:



Gooie raod waor duur. Mèr Frans Coenjaerts, dae ziech veur de gelegenheid prizzenteerde es ‘notabele’ van Bieëmele, wis raod: heer leet de commandant weite dat Pierre mèt de carnavalsdaag éch neet gemis kos weure in Bieëmele, umdat heer prins waor van de carnavalsvereniging (die dus nog gaaroet neet besjtoond...) Dat wèrrekde. Pierre kreeg oeteindelik vrij mèt de vastelaovend. Vanwege ’n leuge...

En dao veulde ze ziech in Bieëmele toch neet ech gelökkig bee. Dus besjloote ze bee de sjportsjtiechting op ’t allerlètste momint um toch mèr ’n carnavalsvereniging op te riechte. Geine cent in kas, mèt ’n gelieënd prinsepak veur Pierre, en ’n sjtèl jonge gaste in sjportkleijer mèt derdehands mutse es raod van ellef. Improvisere, dus. Mèr ’t sjloog aan. De Berggeitte waore gebore. De iersjte geit ging de lóch in. D’n iersjte optoch – now ja, ’t ierste optöchske – trok door ’t dörrep, en Bieëmele dansde en sjoenkelde.

Daonao ging ’t weijer. Tot op vandaag. De Berggeitte besjtoon noe al 55 jaor, en de Bieëmelenaere viere same mèt hun al 55 jaor vastelaovend in eige dörrep. Dat maog gevierd weure. Geit ’t? Jao huur, ’t geit nog altied...



Soapserie seizoen 6..

Dit kier in de langstlopende soap van dis gezet
“t gemeinsjapshoes, Rome is ouch neet op eine daag gebouwd”

Mer ierlik is ierlik, ’t begint d’r op te lieke dat in 2026 dan toch eindelijk vaart keump in de verbouwingsplanne. En ’t weurt nog sjoener dan belaoft: Inmiddels is d’r al behuutlik gesjloopt (of is dat allemaol vanzelf umgevalle?) en is ouch al begonne met de bouw. Zoe is ’t zjwumbad achterum inmiddels klaar mét un sjoen zonneterras zoedat behalve al die andere clubs en verenigingen die gebruik make van t gemeinsjapshoes veer noe ouch eindelijk die zjum en club, waterpoloclub kinne opriechte. Veur de bejaarden is dr sjtraks ouch de meugelikheid veur Aquafitness. Veur de keender weurt nog gedach aan ’n waterglijbaan vanoet de keuke.

Mer oudch binne sjut ’t op: un sjoen vergaderruimte met daorin de ouw gemeinteraod taofel van de gemeente Bemelen, zoedat ’t gevreigel en ge-ouwehoor van de raad oet dae tied weer in iere hersjtelde kin weure. Zee höbbe zelf un oud raodsid oet dae tied met ruime ervaring.

De ruimte in de zaal weurt perfect aangepas aan de huidige behoeftes in t durrep en is multifunctioneel inzetbaar. Zoe haet de voetbalclub al aan de carnavalsvereniging gezeen dat ’t meuilik is um 11 man beeein te kriege en zee zee 7 tege 7 goon voetballe bee de 35+. De nuije zaal is precies genoeg um hun wedstrijde binne aaf te kinne werreke, ongeacht de waersumstandigheden. De keeper van de 35+ zal tevens deens doen es barkeeper want dae haet toch neet veul anders te doen.

De carnavalsvereiging haet ouch besjlote dat de carnavalsdeensdag terök kump in de zaal. De groete optoch is inmiddels toch zoe gekroompe dat ouch dae binne es unne soort polonaise aafgelag kin weure, d’r maoge immers gein wages mie met doen. Es oetzoondering maog allein de nuije wage van Wiel Pittie in de optoch met en zal met de carnaval es preensewaage deens goon doen.

De joonkheid haet zich d’r ouch bee neergelag en besjlote dat ouch met de Mei-den te doenL neerlegke... Es zee de mei-den neerlegke in plaats van rechtop zette höbbe zee minder manne nudig um hum op te zette en kinne zee zich concentrere op t dreinke. Zee zulle d’r veur zurrege dat de meiden neet langer is dan dat de zaal is zoedat dae in de lengte d’r in pas.

De sjeetverreiniging laote de oetnudiging nog effe sjete en blieden veuralsnog nog in de café umdat ’t hun nog neet genug opsjut.

’t materiaalhok zal weure umgebouwd tot repetitielokaal veur de hermenie en veut march-exercisies kinne die gebruik maken van de keuke. De kelders van ’t gemeinsjapshoes zulle weure umgetoverd tot escaperooms. Un ierder plan um hei un parkeergarage van te make sjtuitte op bezwoere van de verontruste plateaubewoners, ’n rede heiveur is neet aangegeven anders dan dat zee op dit moment niks anders houwe um zich ongerus euver te maken. Allein veur de oto van Wiel Pittie weurt weer un oetzoondering gemaak. Wiel maog ziene oto in de meterkast of links onder ’t buffet parkeren. Tensjlote maoge alle verenigingen, stichtingen, belangengroeperingen gebruik make van de vergaderruimte.

Inmiddels haet ’t zangkoer al aangegeve gein gebruik heivan te make en liever de kerk pas nao ’t zinge te verlaote. Ouch de vogelwerkgroep haet aangegeven hun activiteiten en vergaderingen leever in de zwaluwtoren te houwe. Tensjlote zullen de WC’s weijer weure oetgebreid umdat met zoeveul nuije bezoekers altied waal eine get te zeike haet of urges de sjiet van krijg.

En is de zaal nao de carnaval nog sjteeds neet klaar dan zeen veer us heij weer volgend jaor....

Teikening

Nog mier wis geer dat...

Wls geer dat...?

- Peter Beaujean neet nie de WOW factor haet?
- en dat ’t dan ouch waal bee drei keender zal blieve...

Wls geer dat...?

- de Carnavalsvereniging ouch nao ’t jubileumfees hiel positief bleif?
- Veur hun is de zaal noets half laeg mèr half vol?
- Veer os aafvraoge of ze de slaopende evenementen commissie neet weer wakker kinnen make?
- umdat die geluive dat ze slaopend riek kinnen weure?
- Veer gehuurd höbbe dat de Berggeitte ouch ’t feest op de gemeente Eijsde Mergraote motte regelen?
- De gemeente dao blij met waor want ze houwe ’t al druk genug dao...

Wls geer dat...?

- De gemeente namelik bezig is met de nuijbouwplanne in Bemele? En dat d’r zoe ’n 50 nuij hoeze zouwe komme?
- Van die 50 hoeze d’r 18 sociale woeninge gepland zeen, 12 “normale” hoeze en 20 asociaal deur woeninge?
- ’t volges os dan ouch tied weurt veur un nuij lieger sjoel, unne supermerret en un Rabobank...?

Wls geer dat...?

- d’r dan nog get mier sjtraote bee komme die unnen naam motte kriege?
- veer waal get suggesties höbbe nbaodat veer veurig jaor de Nijskens Allee höbbe geopend?
- zoe es: de Avenue Andriën, de Gorissen Gats, de Via Vollers, ’t Pirnay Pad en.... Ozze favoriet sinds dit jaor: de “Peter-Jan weg !!! “



Oet de ouw does...

Surfend op ’t Internet kumpste nogal ins get tege... En neij dan bedoel iech gein foto’s en filmpkes die de wederhelf of keender neet maoge zeen (ja dat ouch waal mer good,...) Neij veer bedoele al de zjwik dae luij vreuger d’r op gegoeid höbbe en ’t waarsjijnlijk al vergete zeen...

Zoe ouch de “Club van NEET oud preense “ un soort van open sollicitatie groepke van luij die oets unne kier oud preens, en dus ouch preens wilde weure... En,... dat is nog geluk ouch... Un aantal leden zeen inmiddels geroyeerd umdat ze inderdaad preens (en oud preens) zeen gewoore, binne 5 jaor nao opriechting waore al 3 leden preens (Marcel Nijaskens 2010, Jos Gorissen 2012 en Cyril Bollen 2012) Onbekind is of de euvergebleve leden nog in de race zeen en of d’r nog nuij leden weuren aangenommen mocht geer aspiraties höbbe. Ouch onbekind is of die Hieriezitting d’r oeteindelik waal gekomme is?



Welkom op onze kersverse webpage van de Club van NIET Oud Prinsen Bemelen.

Onze club heeft 2 doelen;

1. Het organiseren van een Herrenzitting
2. OOIT Prins van CV De

Berggeite te worden!

Onze club is opgericht d.d. 15 Februari 2009 om 20:45 uur met als oprichters: Cyril Bollen, Jos Gorissen, Marcel Nijskens, Eric Janssen, Jo Houben en Ruud Engelbert.

Om 20:55 uur zijn de volgende bestuurtaken toegewezen:

Voorzitter:	Jos Gorissen
Penningmeester:	Jo Houben
Secretaris:	Eric Janssen
Bestuurslid:	Cyril Bollen
Bestuurslid:	Ruud Engelbert
Bestuurslid:	Marcel Nijskens



R.K.V.V.B.M.

Nao de teleurstellende degradatie van veurig jaor haet de FC de draod weer opgepak. D'r höbbe waal rigoreuze veranderingen plaatsgevoonde. D'n trainer is ontsjlage en vervange door eine van Sjaarn (Mestreech) en ouch 't aantal Bemelse sjpelers is weijer terökgebrach zoedat dat noe ongevaer geliek is aan 't alcoholpercentage in e glaas beer (4,5 %). Inmiddels höbbe ze behalve rugknummers ouch name achterop de rugk zoedat de supporters weite wè wè is... Veur de luij die ins wille goon kieke: Bemele voetbalt van links nao rechts in de roed-zjwarte truikes, in de twiede helf euveriges van rechts nao links, afhankelijk van boe geer sjtaot.

Zoe es bekint ligk de helf van 't voetbalveld in Mestreech en noe is de invloed van Mestreech nog weijer oetgebred. Zoe is de training van vriedagaovend verplaatst in verband met wedstrijde van MVV zoedat de sjpelers nao MVV kinne goon kieke (Boe 't percentage mestreechenaere op 't veld ongevaer geliek is aan 't alcoholpercentage in e glaas alcoholvrij beer)

Noe goon d'r geruchte dat MVV, op zeuk nao un lokatie veur hun nuije stadion serieus aan 't kieke is nao sportpark de Sleitel in Bemelen. Dao is netuurlik get veur te zegke. Zoe haet MVV alle kieren dat ze heij gevoetbald höbbe gewonne, Ligk d'r hei jun prachtige graaswei (un vereiste es te weer nao de Eredividie wèls) die noe good oonderhouwe weurt door un robot graasmesjien, en haet de club un geweldige supportershome boe ze allemaal e glaas beer kinnen dreinke. Qua zitplaatse zulle d'r waal un paar sjteul beegezet motte weure.

In verder gesjprekke mot nog blieke of d'r meugelik sjprake kin zeen van 'n fusie boe bee sjpelers transfervrij euvergenomme kinnen weure. Qua naam mot nog bekeke weure wat de meugelikheden zeen en wat de supporters motte goon rope: Sjenge, Sjenge of Boere, Boere....

Veur de hand ligk dat de naam Bemelen gehandhaafd zal blieven gezeen de ligging en de naam BVV is dan logisch. Indeiling zal blieve in de 5^e klasse A zoedat eenkele euverwinningen in eeder gevalgegarandeerd zeen, wat netuurlik nuij is veur die van MVV.

't twiede zal zeen wedstrijden in 't gehiel sjpele in de Geusselt wat veur de dao achtergebleve supporters wienig versjeel zal oetmake...

Beer wie water....

Sjieke kalender hōbbe die van de Heemkunde gemaak veur 2026. Mèr klop 't auch allemaol wat d'rop sjteit? En sjteit waal alles d'r op wat d'rop zou moote sjtoon? Dat zeen de vraoge woe de redaksie van dees gezèt, krieties wie altied, zich de aafgeloupe weke gebooge haet. Oos konkluzie: veer misse gèt hiel belangrieks...

Water. Dat is 't thema van de kalender. En dao weurt inderdaad hiel gèt euver gezag en gesjreve. Mèr 't verhaol is neet kompleet. Wat ontbrik: beer. Inderdaad: beer. Dat sjpul mèt dae sjoemkraag. Huurt dat waal op dae kalender thoës, zult geer uuch aafvraoge. Zeker waal. Al is 't mèr umdat beer veur 95 procent oet water besjteit. De rès is 'n paar procent alcohol. In feite is beer gewoon aangelengd water, water mèt 'n sjmaekske.

Kiek, d'r waor 'nen tied, 'n paar ieuwe geleije, dat de luij in Biëmele mieër beer droonke es water. Umdat beer lekkerder waor, mèr auch gezoonder. En umdat d'r noe einmaol mieër kaffees waore es waterputte. Dat 't water vreuger neet altied eve good waor, dat sjteit waal op de kalender van de Heemkunde. Mèr dat beer dus neet. En dat is jaomer. Want dan zouw duudelik weure dat 't historisch verklaorbaar is dat vööl luuj in Bieëmele, mèt name de echte Berggeitte, vandaag de daag nog altied beer dreenke esof 't water is. Dat is gein afwieking, dat is tradisie, dat is cutureel erfgoed. In Bieëmele weite ze gewoon neet beter.

Daorum veende veer 't 'n gebrek aan historisch inziech dat 't beer gein plaats haet gekrege op de Heemkundekalender 2026. Van de Heemkundevereniging hawwe veer beter verwach. Die zouwe zoegèt toch aan hun water moote veule. Of zouwwe ze dao gein beer löste? Veer hōbbe hun veur de kalender van 2027 al 'n nuuj thema aan de hand gedoon: Bemelenaere en alles wat ze ziech in de aafgeloupe ieuwe hōbbe laote insjudde.....



En noe mèr vogele !!

't Haet eve gedoord, mèr noe is 't toch vaerdig – en offisjeel geopend: de zijwalberhut bee de gedeenkplaats veur de corona-epidemie aan de Koogrub. Want moch geer, es geer d'r toevallig langs komp, soms deenke: dit is nog neet aaf, dan is dat 'n misversjtand: die looker huure d'r in. 't Is de bedoeling dat dao sjtraks de zijwalbere door nao binnen vleege um op hun gemaak te kinne... Nou ja, vogele, dus.

Veer hōbbe lang gedach dat die hut d'r noets zouw kome. In iersjte instantie waire d'r planne veur 'ne zijwalberetore. Mèr dat bleek al gauw letterlik en feguurlik te hoeëg gegrepe... 't Oetziech vanaf 't terras van Die Twie zouw d'r neet op veuroet goon, en volges os zaog de gemeente 't auch neet zitte. Veer verwachde auch bezjwoere van de Verontruste Plateauboewoners, mèr die hawwe blikbaar gèt beters te doen. En die van de manèesj dörfd al hielemao neet hoeëg van de tore te blooze....



Enfin, 't woort dus 'n hut. 'n Zijwalberhut. Mèr umdat auch ander veugel welkom zeen, maog geer auch gewoon vogelhut zègke. Nei, nei, 't is gein trèkkershut. Ze is allein bedoeld um te vogele – veer bedoele de hobby van de Vogelwerkgroep, dat sjnap geer waal – en neet um te trèkke – de hobby van sommige ander luij, woe veer 't weijer neet euver zulle hōbbe. Mèt al die sjplete tóssje de planke zal 't dao binne trouwes zoewiezoe waal trèkke. Mèr dat vogele die vogelaers zich dan mèr oet.

Weijer is 't noe aafwachte of die zijwalbere, echte trèkveugel wie geer wèt, komend veurjaor vanoet Afrika de weeg nao die hut weite te veende. Of, wie d'n Hollènder zag: 'Misschien hebben ze er helemaal geen trek in...' Die conclusie dörve veer noe nog neet te trèkke. Eve aafwachte.

Bieëmele haet d'r hoe dan auch weer 'n aantrèkkelijke attractie bee...

B.O.T.S.

't Aafgeloupe jaor waor de letste aaflevering van BOTS, the Battle of the Sexes. Veer begriepe dat waal, de dames zeen inmiddels bijnao allemaol getrouwd, hōbbe de buit binne en sommige hōbbe zelfs al keender. Dan is al gouw dudelik wae de Battle oeteindelik gewonne haet (veer es al langer getrouwde manne wiste dat al van te veure) en neet allein is dao n einde gekomme aan de battle, ouch the seks(ex) is dan wiet veurbee.... (ouch dat wiste veer es langer getrouwde mannen al..)

Zes jaotr lang hōbbe de vrowlij in t gemeinsjapshoes de tent aafgebroke, dus veer sjnappe urreges waal dat die van 't gemeinsjapshoes zoelang gewach hōbbe met de verbouwing, anders blijfste bezig.

Mer wae geit dat look opvulle,... boe kinnen de manne, es die sjtraks de brook en de (voetbal)sjeun hōbbe motte inleveren um same met de vrouw te goon wienkele op zoondig, dan nao tou?

Boe kinnen zee terech um un glaas beer te dreenke, sjlap te ouwhore en effe dat gezwets euver de keender, de bondgenoten, liefde op het eerste gezicht en wie is de mol te motte aanhuure? 't Mannekoor is d'r ouch al neet mie en de joonkheid maog 'm ouch me reine kier rech zette per jaor...

D'r is eigenlijk me rein plaats boe zee terech kinne: de innige manneclub die Bemele nog riek is: de raod van ellef...

Veur al die mannen hōbbe veer 'n leedsje gemaak heij neve....



B.R.G.T (op de wijs van Y.M.C.A)

Hey jong, zit ze noe in de put
Iech zegk Hey jong, liek 't leve soms kut
Iech zegk, Hey jong, ouch al beste getrouwd
hoofs diech neet zoe rot te veule

Hey jong, zeuk ste urreges plezeer
Iech zegk Hey jong, hōbste zin in get beer
kom nao os tou, want de veuls diech hei thoës
lekker zoepe en ouw hoore

iech goon zoe gaer nao de berggeitte tou 2x

lekker sjrak in t pak, met un muts op de kop
polonaise met de preens veurop...

iech goon zoe gaer nao de berggeitte tou 2x

Gein gezeur aan de kop, mer 'n lekker tuut friet
lekker doen wat ste wèls en geniet

Hey jong, huurste wat iech diech zegk
Iech zegk hey jong, deenkste waal 'ns verrek
Iech zegk hey jong, wat is dien groete weens
sjtraks weurs diech nog uns de preens jao...

en dan, bes diech eve de baas,
Iech zegk hey jong, zegste vruiwke helaas
en dan geiste, nao de berggeitte tou
amuseer diech zonder dien vrouw

iech goon zoe gaer nao de berggeitte tou 2x

Met z'n elven op sjtap, lekker zaat aan de tap,
..en d;r weurt altied waal bee gelap

iech goon zoe gaer nao de berggeitte tou 2x

weut 't toch weer get laat en wèls diech trök nao de vrouw
Bringt de taxi diech weer nao heur tou,

Hey jong, iech waor oets ns wie diech
Iech zegk, iech houw toen ouch zoen lang geziech
veulde miech toen, sjlap en ouch gaar neet fijn
veulde miech al- le- maol allein..

Toen kaom eine man nog miech tou
and vroeg miech of, iech bee de raod wou
bee 't clubke van die sjoen raod van elf
en toen woort iech weer ech miech zelf..

Be-Reg-Gei-TE iech goon zoe gaer nao de be-reg-gei-te

NIEUWS-FOTO-QUIZ



"kDaot mèt, en weur lezer van 't Carnavalsseizoen 2026 !

Terök van weggeweaes: Uzze " lezer van 't jaor" verkeezing of, in os geval, unne " lezer van 't carnavalsseizoen" Eederein kin met doen, 't is neet meijlik, geer hoof bee de foto's allein mer't gooje ondersjrif te keeze. Väöl succes !!



Foto 1.
A. Gemeinsjapshoes reup geistelijke beesjtand aan bee verbouwing
B. aanleg parkeerplaats 'n feit ondanks protesten...
C.
Ee



Foto 2.
A. Jhon Tana zonder sjtrik en zonnebril
B.
C.



Foto 3.
A. Sjlechte recensies Green resorts Bemelen
B. Hennepkwekerij ontdekt op t wolfshoes
C. Hermenie kies veur goodkoupere feesttent volgend fees...



Foto 11.
A.



Foto nr
A. Vers Voordeel Vaessen sjtart ouch thuisbrengservice
B. Nuij weenkelkerkes greuntezaak nog gein succes...
C. Nickpic.....



Foto nr
A. Massa polonaise graaf ontdek op kerkhof Bemele
B.
C.



Foto nr
A. Pas op met Pisse, Sjrikdraod...
B.
C.



Foto nr
A. Eengel weurt geinterviewed veur nuije film kerrek Bemelen
B.
C. Nuij koorlid antoniuskoo zingt oet volle borst 't Angelus



Foto nr
A. Oplevering gerenoveerd Gemeinsjapshoes velt tege
B. Actiegroep tege opvangcentrum vlucht -zjwaluwe
C.



Foto nr
A. Allein Gastobar DieTwie profiteerd van watereuverlas... Veeze forel vange vanaaf 't terras
B. DieTwie lok raad van ellef met hieringe op asgoonsdig



Foto nr
A. Nuij materiaal hok Hermenie al klaar in t gemeinsjapshoes
B. Sjpeciale instrumentenhouwer veur zeikerds van t Bemels keteerke
C.

Dat waor 'm weer veur dit jaor...
Geer höb 'n gans jaor um d'r veur te zurrege dat geer ouch op dees pagina terech komt door veural euch sjtomste foto aan us op te sjture...
Anders is dr altied waal eine in de buurt um uch miest genante momint vas te legke...